



Politička organizacija građana "Naša stranka"  
Branilaca Sarajeva 5/1, 71 000 Sarajevo  
Telefon: 033 408 888; Fax: 033 408 881  
E-mail: nasastranka@nasastranka.ba  
Web: www.nasastranka.ba

Broj: \_\_\_\_\_/18  
Sarajevo, 07.05.2018.

Skupština Kantona Sarajevo  
Zastupnik Predrag Kojović  
Klub zastupnika Naše stranke

BOSNA I HERCEGOVINA  
FEDERACIJA BOSNA I HERCEGOVINA  
KANTON SARAJEVO  
Skupština Kantona Sarajevo  
n/r predsjedavajuća Ana Babić

Vlada Kantona Sarajevo  
Ministarstvo prostornog uređenja, građenja i zaštite okoliša Kantona Sarajevo  
n/r ministar Čedomir Lukić  
Ministarstvo obrazovanja, nauke i mladih  
n/r Ministar Elvir Kazazović

#### **PREDMET: ZASTUPNIČKA INICIJATIVA**

Poštovana/i,

na osnovu članova 106. i 213. Poslovnika Skupštine Kantona Sarajevo ("Službene novine Kantona Sarajevo", broj 25/10, 14/11, 19/11, 7/12, 26/12) upućujem sljedeću inicijativu prema Ministarstvu prostornog uređenja, građenja i zaštite okoliša Kantona Sarajevo, na koju tražim odgovor u zakonski predviđenom roku:

1. Podnosim inicijativu da se planira izdvajanje novčanih sredstava te pokretanje aktivnosti potrebnih za obnovu Astronomske opservatorije na Trebeviću, poznate kao tvrđava Bistrik kula.
2. S ciljem što bolje realizacije projekta obnove objekta Bistrik kula te korištenja opservatorije u edukacijske svrhe, potrebno je da Ministarstvo prostornog uređenja, građenja i zaštite okoliša i Ministarstvo obrazovanje uspostave saradnju sa Astronomskim društvom "Orion", kojem bi objekat bio ustupljen na korištenje.
3. Za obezbjeđenje novčanih sredstava potrebnih za obnovu opservatorije, potrebno je dio sredstava planirati u Budžetu KS, kao i uspostaviti saradnju sa Zavodom za zaštitu kulturno-historijskog naslijeđa, Općinom Stari Grad te potencijalnim domaćim i međunarodnim donatorima.

U interesu je Kantona Sarajevo, da uz podršku općinskih i gradskih vlasti, kao i domaćih i međunarodnih donatora, pokrene aktivnosti potrebne za obnovu Astronomske opservatorije na Trebeviću te da se, u saradnji sa Astronomskim društvom "Orion", na tom lokalitetu počne raditi na popularizaciji astronomije i drugih prirodnih nauka. Jedino uzajamnom saradnjom navedenih subjekata bi moglo doći do realizacije projekta obnove Bistrik kule, a s obzirom na obrazovni značaj

Astronomske opservatorije, smatram da bi Kanton trebao učiniti prvi korak za uspostavljanje ove saradnje i iznalasku sredstava.

Dakle, ideja je da obnovljena opservatorija bude ustupljena na korištenje AD "Orion" i tako postane mjesto za popularizaciju svih prirodnih nauka, ne samo astronomije. Tu bi se održavale različite aktivnosti kao što su Škole u prirodi, radionice za učenike, predavanja za građane, posmatranja neba. Teleskop koji bi se montirao bio bi robotskog tipa, odnosno moći će mu se pristupiti preko Interneta. Tako bi i učenici i studenti iz drugih dijelova BiH mogli vršiti posmatranja neba i istraživanja.

Inače, Astronomsko društvo je 1968. godine dobilo na korištenje austrougarsku tvrđavu na Trebeviću poznatu kao Bistrik kula. U periodu od 1968-1973. dobrovoljnim radom članova izgrađene su dvije kupole (3,6 i 4,6 metara) i u njima postavljeni teleskopi. Opservatorija se bavila popularizacijom astronomije, edukacijom mladih, stručnim i naučnim radom. Tokom opsade Sarajeva 1992-1995. kompleks opservatorije je razoren. Sve kupole, instrumenti i ostalo su uništeni ili odneseni.

U registar udruženja Federalnog ministarstva pravde 11.03.2008. godine upisano je Udruženje „Astronomsko društvo Orion“ kao pravni sljedbenik predratnog Univerzitetskog astronomskog društva. Općina Stari grad 2010. godine obavlja proceduru upisa objekta Bistrik kula u svoje vlasništvo. Nakon toga, općina Stari grad i Astronomsko društvo Orion 10.12.2010. godine potpisuju Ugovor o korištenju objekta Bistrik kula bez naknade. Općina Stari grad svojim Rješenjem od 06.12.2011. izdaje sama sebi Urbanističku saglasnost za izvođenje radova rekonstrukcije i prenamjene objekta Bistrik kula u Opservatoriju.

Općina svojim aktom sredinom 2012. obavještava AD "Orion" da se mora plaćati najamnina za korištenje objekta. AD Orion je uplaćivao mjesečni iznos općini Stari grad od 134,78 KM na ime najmnine, iako je objekat i dalje bio devastiran i kao takav neupotrebljiv. U AD "Orionu" su se nadali da će naći sredstva za obnovu. Kada se to nije desilo, Ugovor o najmu je prekinut 01.04.2016. jer Društvo više nije imalo sredstava ni za tekući rad, tako da ni to plaćanje nisu mogli nastaviti.

U međuvremenu, AD "Orion" je nastavio svoje aktivnosti na popularizaciji astronomije kroz mnogobrojna javna posmatranja neba za građane, realizaciju astronomskih radionica za djecu, obavještavanja javnosti o svim značajnijim astronomskim pojavama i fenomenima, te pokretanjem Bosansko-hercegovačke meteorske mreže. Također su nastavljene aktivnosti za obnovu Opservatorije, ali još uvijek bez rezultata.

Napominjem još da je ova inicijativa također u skladu s Planom upravljanja Zaštićenim pejzažom "Trebević" koji je prije godinu dana utvrdilo Ministarstvo prostornog uređenja, građenja i zaštite okoliša, u saradnji sa Kantonalnim zavodom za zaštitu kulturno-historijskog i prirodnog naslijeđa Sarajevo, a putem konzorcija Institut za hidrotehniku d.d. Sarajevo i firma ZaVita d.o.o. Ljubljana.

S poštovanjem,  
zastupnik Predrag Kojović  
Naša

stranka